

ren/ als die grosse auff dem Ruggen/ die er für die Wassen brauchet/ so voller Stacheln ist/ vnnnd eine grad darhinder/ 2. bey den Ohren die seyndt gefarbet als wie der Fisch/ aber die zwo an dem Bauch/ vnnnd die hinder dem Gefährloch/ vnnnd das vndertheil des Schwanzes seyndt rothfarbig/ er ist zimlich breit/ aber hinder dem Gefährloch spizig von Leib/ die Linien von den Ohren/ biß an den Schwanz gehet ihm hoch vber den Ruggen hinauß. Hat vierfache Ohren/ vnd zwar keine Zähne/ aber seine beyde Leffzen seyndt ihm rauch als ein Feilen/ hat sehr vil vnd guten Kogen.

### Das elffte Capitel.

## Von den Barben vnd Treuschen.

### Von den Barben.

**B**Arbus, Barbo, Barbulus, heisset bey den Hispaniern vnd Italienern Barbo, bey den Franzosen Barbeau, Barbet, Barbario, bey den Niderländern Barbeel/ bey den Teutschen Barb/ Barben/ Barbel/ bey den Saren Parme/ bey dem Bellonio Mustacatus. wegen seines Warts/ die Meyländer heissen die grösseren Barbos vnnnd Barberos vnd die kleinen Balbetos, sagt gemelter Bellonius.

Diser ist in vnseren Landen ein ganz wohlbekanter Fisch/ allein zu mercken daß er ganz keine Zähne hat/ sonder bey jeder Seiten rauche/ harte/ Riffbaggen/ alsdann auch etliche andere der Schüepfischen/ so in süessen Wasseren wohnen/ item daß auch seines Geschlechts/ ein Art im Meer laufft/ hat wenig vnderscheid/ allein daß er vil weisser vnnnd schöner ist.

Wie vil die alten Römer auff solchen Meerbarbelen gehalten/ findet man bey vnderscheidenlichen Scribenten, die ihne Mullum vnd Triglam nennend/ als bey Plinio lib. 9. cap. 17. Hor. lib. 6. Serm. Sat. 2. Cicero. & Iou. de Pisc. Rom. cap. 18. dahin seye der Leser gewisen.

Vnsere hieländische Barben/ fressen Wries/ Kraut/ Schneggen vnd Fisch/ verschonen auch ihres eigenen Geschlechts nicht/ wohnen gern in hohen Gestaden vnnnd Bächen/ graben wie ein Sauw/ verschliefen

sich